



1. oktober 2025

UKA2025/37

Uunga siunnersuut: Pigisanik aalaakkaasunik piginnaatitaaffimmik pisisarnej imaluunniit atuisinnaatitaaneq pillugu Inatsisartut inatsisissaattut siunnersuut.

(Ineqarnermut, Attaveqaasersuutitut Isorliunerusunullu Naalakkersuisoq)

Naalakkersuisut pigisanik aalaakkaasunik piginnaatitaaffimmik pisisarnej imaluunniit atuisinnaatitaaneq pillugu Inatsisartut inatsisissaattut siunnersuut saqqummiuppara saqqummiussaannut Siumut sinnerlugu qujanarusuppugut.

Tamannalu pillugu Siumumiit imaattumik oqaaseqarfigissavarput.

Inatsisip qaqinneqarneranut tunngaviuvoq ukiup nutaap aallartilaarnerani nunarsuarmi pissutsit kiisalu aamma Nuummi mittarfiup ammarnerata malitsigisaanik, nunatta avataaneersut aningaasaatilissuit annertoorujussuarmik sunniuteqarnerluttumillu ingerlatsoqarsinnaanera pinngitsoortinniarlugu aningaasanut inatsimmut ilassutissatut oqaasertaliussat partiit tamarmik akuerisaat tunngavigalugu matumuuna Naalakkersuisut inatsisissatut siunnersuummik matumuuna Inatsisartunut suliakkiussaqlutik.

Naalakkersuisut inatsisissatut siunnersuuteqarnerminni saqqummiuppaat, nunani allani innuttaasut illunik assigisaanillu pisisinnaanerat killilerneqassasoq. Siunnersuummi tunngavigineqarpoq pisariaqartinneqartoq aqutsinermik erseqqissaasoqassasoq, illunut assigisaanullu tunngatillugu innuttaasut pisinnaatitaaffiinik illersuinissaq nukittorsarneqassasoq kiisalu nunanut allanut tunngatillugu erseqqissaasoqassasoq.

Siumut isumaqarpoq siunnersuut aarlerinartoqartoq, siunnersuut aallaqqaammut periarfissiimmat Danmarkimi innuttaasut aamma suliffeqarfiit nunatsinnut illuliornissamut assigisaanillu pisiortornissamut killeqanngitsumik pisinnaatitaaffeqassasut. Siumut isumaqarpoq tamanna isumakulunnartoq, erseqqissumik aalajangersarneqarsimanngippat kikkut kalaallisut innuttaassuseqarnerisut. Taamaalilluni danskisut innuttaassusillit immikkoortinneqarsinnaanatik nunatsinni aammaarluni pisinnaatitaaffeqalerput, naak nunatsinni innuttaasut – uagut – pisinnaatitaaffivut immikkut qulakkeerneqarsimanngikkaluartut.

Siunnersuut naapertorlugit danskisut innuttaassuseqanngitsut tunngaviummik nunatsinnut aningaasaliisinnaanerat ajornarnerulersinneqassaaq, taakku pillugit ilaatigut Naalakkersuisut immikkut akuersisimanngippata. Tamanna immi aamma killilersuisuuvoq, nunatsinnilu ineriartortitsinissamut periarfissanik annikillisaataasinnaalluni, aamma danskisut aningaasaliissutaanik kisermaassisunngornerunissat tunngavimmigut eqqunneqassaaq. Tamanna inuiaqatigiinni naligiinnginnerulersitsinissamut tunngavimmigut pissusissamisoornersoq,



Nunatsinnilu innuttaasunut immikkut illersuinertut siunertaqarnersoq ataatsimiisitaliami sukumiisumik nalilersorluarneqartariaqartoq Siumut isumaqarpoq.

Siumup isumaqarpoq pitsaannerusumik aaqqiissutigineqarsinnaasut ujartrorneqartariaqartut, taamaalillutik inuit ataasiakkaat imaluunniit suliffeqarfiit annertuumik illunik allatigulluunniit pigisanik killeqanngitsumik piginnittunngorsinnaanerat killilersorneratigut. Ilaatigut periarfissiisoqarsinnaavoq, illuutini amerlasuunik – soorlu inissiarsuarnik – aningaasalersuisoqarsinnaasoq, kisianni piumasaqaataassalluni kingorna atuisunut tuniniarneqassasut, taamaalilluni ataatsimut katillugu pigisaqarpallaalinnginnissaq qulakkeerniarlugu.

Siumup erseqqissarusuppaa, oqaaseqaatitsinnut tunngatillugu isumakulunnarsinnaasunik imaqaarsinnaammata, Kalaallit Nunaanni kalaallisut innuttaassuseqarneq immikkut Inatsisartuni sammisimatinnagu aalajangersarneqarsimatinnagulu uani aalajangersaanissatsinnut sakkussaaleqinarsinnaalluni. Apeqqut taanna suliarineqartariaqartoq Siumut isumaqarpoq, tassa innuttaasut nunatsinni najugaqartut immikkut pisinnaatitaaffiit pillugu erseqqissisitsinnaaneq amigaaatigineqartoq ilanngullugu qulaajarneqarluni pisariaqartoq Siumut isumaqarpoq.

Taamaattumik Siumut isumaqarpoq siunnersuut taamak isikkoqartillugu saqqummiunneqartoq tunngavimmigut qulaajagassartaqartoq nalilersugassaqartorlu. Kikkut qanoq pisinnaatitaaffeqarnersut nunatsinni erseqqissassallugu pisariaqalersoq Siumut isumaqarpoq, aamma nunaminertanik piginnittuunissamut, taakkunungalu ilanngullugit pisussaaffiit allat pisinnaatitaaffiillu eqqarsaatigalugit. Tamatuma saniatigut pingaaruteqarpoq erseqqissassallugu, innuttaasut nammineq iluaqutigisinnaasaat tunngavigalugit sulissasugut pisariaqarmat.

Siumumiit pingaartipparput inatsisip pitsaanerpaamik qulakkeerinnittumillu suliarineqarnissaa suliarineqassasoq. Taamaattumillu suliassaq Inatsisinut Ataatsimiisitaliamut ingerlateqqikkusullutigu.

Qujanaq.

Erik Jensen

Siumut